



15.august 2019

UKA2019/109

Inatsisartut suleriesianni § 33 naapertorlugu aalajangiiffigisassatut siunnersuut imaattoq matumu-una saqqummiuppara:

Kunngearfiup Danmarkip Issittoq Pillugu Periusissiaata 2011-2020-mut atuuttup taartissaata suliarinerani Kalaallit Nunatta soqutigisai Issittumut tunngasut qitiutinneqarnissai qulakkeerniarlugit Naalakkersuisut danskit Naalakkersuisui saaffigissagai qulakkeerlugulu siunissami Kunngearfik sinnerlugu Issittumut Periusissiaqarnermi Naalakkersuisut ilusilersueqataasumik allaqataanissaat, sunniuteqaqataasumik piginneqataasumillu qulakkeerlugu Issittoq Pillugu Kunngearfiup periusissiaa Issittormiortaasunit ilusilersorfioqataasimasoq anguniarlugu Naalakkersuisut peqquneqarnissaannik Inatsisartuni aalajangiiffigisassaattut siunnersuut.

(Inatsisartunut ilaasortaq Aleqa Hammond, Nunatta Qitornai)

Tunngavilersuut:

Nunatsinni nunanut allanut politikkimik oqartussaaffik tamakkiisumik Danmarkimit oqartussaaffigineqarpoq, Namminersorlutik Oqartussaasut akisussaaffinnik sulii tigusimanngisaani. Oqartussaaffiup ullutsinnut Kalaallit Nunatsinnut tulluurtumik inerisaavigineqartuarnissaannut politikkikkut oqartussaaqataanisigut akisussaaqataasumik inerisarnissaanut pisussaaffeqarput.

Kunngearfiup Issittoq Pillugu Periusissiaa 2011-2020-mut atuuttup danskit soqutigisai annertuumik qitiutinneqarput, Savalimmiormiut aammalu Kalaallit Nunaata soqutigisai ataatsimoorfiusinnaasut, periarfisiissutaasut unammilligassallu ilanngullugit.

Nunarsuarmioqatigiit Issittumut soqutiginninnerat annertuseqaaq. Tamassuma kinguneraa periarfissanik unammilligassanillu nutaajusunik nassataqarnera, pingaartumik silaannaap allanngoriar-tornerata, Issittumi aningaasarsiorsinnaanerup periarfissaqarnerulerneru minnerunngitsumillu pisuussutinik atuisinnaanerulernerup periarfissaqalersitsinera eqqarsaatigalugit.

Kalaallit Nunatta Issittumi sulinermini aningaasarsiornikkut siunertai soqutigisaalu danskit soqutigisaanit allaanerungaatsiartarput, killormuanillu. Danskit illersornissakkut soqutigisai nunanut allanut politikkeqarnerminni soqutigisai aammalu sillimaniarnikkut soqutigisai Kalaallit Nunatta soqutigisaanit assigiinngitsuusinnaapput. Taamaakkalurtoq Kunngearfik sinnerlugu Issittoq Pillugu Periusissiaqarnermi sapinngisaq tamaat atorlugu tamatta soqutigsavut peqataatillugit periusissiaqartariaqartugut pingaartutut taasariaqarpoq, pingaartumik Issittoq pineqartillugu. Ataatsimoorfigalugu suliaringaanni periusissiaqalissagaluarpooq Danmarkip Kalaallit Nunaatalu soqutigisaanik ataatsimoor-titsisoq, Kunngearfik sinnerlugu periusissiatut taaneqarsinnaalersillugu.

Nunatta Qitornai

Inatsisartuni



Ullumikkut danskit Naalackersuisuisa periusaat unaavoq, Danmarkimi Issittoq pillugu periusissiaq danskit soqutigisaanik qitiutitsisoq suliaralugu piareeraagamissuk naqereerlugu Kalaallit Nunatsinnukaallugu Naalackersuisunut saqqummiunneqartarpoq kingornalu innuttaasunut saqqummiunneqartarluni. Tamanna tunngaviginiarneqartarpoq oqaatigisinnaanngorlugu innuttaasut oqartussaasullu periusissiaq pillugu oqaloqatigiissimanertut, tusarsimanertut aammalu peqataatitsisimanertut. Tamannali toqqaannartumik sunniuteqarnerunngilaq periusissiap suliarinerani Kalaallit Nunatsinnit Naalackersuisut Issittoq pillugu isummersoqataasimangippata, allaqataasimangippata Kalaallit Nunaatalu pingaartitaanik periusissiaq ilassuteqarsimatinnagu. Oqaloqatigiinnerinnartut taasariaqarpoq piginneqataaffittut taasinnaanagu.

Kunngaqarfik sinnerlugu Issittoq Pillugu Periusissiaq suliarineqarsimasariaqarpoq kunngaqarfimmit oqartussaasut tamarmik peqataaffigisimasaanik aammalu ataatsimoorfigisinnaasaannik, tamannalu anguneqarsinnaavoq ataatsimoortumik allassimagaanni ataatsimoortumillu tunngaveqarluartunik tunniussaqaarsimagaanni.

Nammineerlunga Issittumi polikkeqarnek pillugu annertuumikk sammisaqartarpunga, pingaartumik Kalaallit Nunatta issittumi soqutigisai eqqarsaatigalugit. Kalaallit Nunatta Issittumi soqutigisai danskit soqutigisai assiginngilai. Issittumi aningaasaqarnikkut ineriartortitsiniarnermi Kalaallit Nunaata soqutisai danskit soqutigisaasa assiginngilai. Taamaattoq Issittoq pillugu ataatsimoorussamik periusissioarnitsinni isumaqarpugut piffissanngortoq Kalaallit Nunaat naalackersuisutigoortumik nunatta soqutigisai qitiutinneqarlutik ilaatinneqarlutillu qulakkeerniarlugu sunniuteqalissasoq, qulakkeerlugulu Kunngaqarfik sinnerlugu Issittoq Pillugu Periusissiaq tassaassasoq Kunngaqarfimmi issittumeersugut sunniuteqarfigisimasatsinnik allaqataaffigisimasatsinnillu periusissiaqalernissaq.

Taamaattumik aaliangiiffigisassatut siunnersuut manna saqqummiuppara neriutigalugu Inatsisartut ataatsimoorlugit Naalackersuisut peqqussagai nunatta soqutigisai aammalu sunniuteqarsinnaanera annerusoq angunissaanut suleqatiserinnissasut suliakkeeqataassasullu aammalu Issittoq pillugu sulinermi issittumeersuusugut sunniuteqarfigisinnaasarput annerpaaq anguniarlugu suleqataanissamut peqataassasut.

Pisortanut aningaasatigut allaffissornikkullu kingunerisassai:

Kunngaqarfiup Danmarkip issittoq pillugu periusissiamik ilusilersuinerani Naalackersuisut akulerutsinneqarneranni allaffissornermi AC-mik ilinniarsimasut marluk tikillugit ukiumut aningaasartutigineqarnissaat naatsorsuutigineqarpoq.

Namminersortunut aningaasatigut allaffissornikkullu kingunerisassai:

Soqanngilaq

Nunatta Qitornai

Inatsisartuni



Innuttaasunut aningaasatigut allaffissornikkullu kingunerisassai:
Soqanngilaq